

欽  
定  
全  
唐  
文

欽定全唐文卷六百二十五目錄

呂溫一

河出榮光賦

黃龍負舟賦

樂理心賦

鑒止水賦

樂出虛賦

齊人歸女樂賦

由鹿賦

并序

管窺豹賦

皇帝親庶政頌

并序

代孔侍郎蕃中賀順宗登極表

代百官請上尊號第三表

賀冊皇太子表

代杜司徒賀大赦表

代李侍郎賀收成都表

代李尚書賀生擒李錡表

欽定全唐文卷六百二十五

呂溫

溫字和叔一字化光河中人貞元末進士再遷爲左拾遺  
以侍御史使吐蕃元和初還轉戶部員外郎再貶道州刺  
史徙衡州卒年四十

河出滎光賦

麗乎天者曰漢紀乎地者惟河居上善以利物順朝宗而  
致和時否則爲災而獨昏墊運至則呈瑞以叶謳歌豈徒  
列四瀆以居貴與百川而隨波者乎當其布德惟新儲慶

茲始濁色既變榮光乃起乍若燭龍噴焰上騰鍾嶺之雲  
又似陽鳥迴翔下落咸池之水增華一代振耀千祀信能  
陵晏海而比崇茂浴日而專美時則纖埃不驚和風充盈  
大野初霽圓靈始清皎且潔兮孤明不雜煥其炳兮五色  
斯呈祥煙斂彩瑞日韜晶掩輕雲而旁屬拂薰風而上征  
百辟具瞻孰云其相照一人乃眷自合於皇明庶品昭蘇  
眾幽光被大哉有國之慶赫兮爲君之瑞臙臙元黃熠爚  
丹翠洞鑒龍宮之人朗見馬圖之字昔在溫洛致美化於  
陶唐復效靈於我皇先後叶德今古和光比屋觀其自化

遐荒望以來王詎比流景集壇獨作郊天之應赤光照室  
空稱誕帝之祥而已哉客有目觀滎河心傾聖日儻餘光  
而見及庶幽谷之可出

黃龍負舟賦

以克已勤物大  
川效靈爲韻

夏后氏奠山疏滯拯溺開泰元珪錫命旣成天下之功黃  
龍發祥始耀域中之大當其駐軫江甸艤舟洪川天行健  
而時有未濟地設險而瞻之在前思利涉以撫俗遂精誠  
而告虔於是雲氣滃起神光爛然奮角於勿用之窟驤首  
於或躍之泉安波澄瀾奉天意以禹若拖尾垂鬣夾王舟

而負焉合靈符於百代表聖運於千年徒偉夫出無情馳  
不測如驅風雷若有羽翼觀竭誠以效用似就列而陳力  
電目流光金鱗耀色天吳奔走陽侯屏息巨險汔濟孰假  
剡木之能潛怪莫逢寧資畫鷁之飾應變化以昭盛出沈  
潛而剛克其慶惟大賴祉福者兆人其觀惟榮執玉帛者  
萬國若非平土堙水泣辜罪已菲飲食以昭儉卑宮室而  
思理德掩乎生成之初功齊乎開闢之始安有非常之神  
物不召而萃止濟其不通而彰其具美者也至若漢橫汾  
水秦抵滄溟實逞心欲匪崇德馨蒼生之虛瘁靡念方士

之空言是聽始幸免於覆溺夫何望乎炳靈於戲動罔軌  
模言非善教則人雖愚弱或使之而不效其志惟純其德  
孔殷則龍雖神化將不役而自勤信矣哉國家俾人其蘇  
在理無鬱超乎大禹不務舟車之勞蛻彼黃龍但爲宮沼  
之物而已

樂理心賦

以易直子諒油  
然而生爲韻

道無象天無聲聖人不有作曷以觀化成由是鼓吹大塊  
鏗鏘元精因乎心而式是理本形乎器而強爲樂名以齊  
五方之俗以厚萬物之生始積中而發外率充性而養情



樂與心冥則所謂固天之縱心由樂理亦得夫自明而誠至若樂在朝廷君臣叶義一發而陽唱陰和九變而雲行雨施上以見爲君之難下以知爲臣之不易有國者理心以此必獲儀鳳之嘉瑞若乃樂在闔閭父子靜專蓋取諸無荒而樂有節而宣和以嚴濟愛由敬全有家者理心以此必返天性於自然且夫樂之作也一動一息心之理也惟清惟直然後在聽而必聰無入而弗克節有序觀貫珠而匪珠聲成文見五色而無色其或惟邪是念惟慝是廋則雖琴瑟在御管絃聿修立樂之方旣失理心之術何求

亦焉望變淳風之浩浩致和氣之油油徒觀其心尚元通  
樂資交暢明則贊天地之化育幽則索鬼神之情狀會節  
有極象之則發而時中應變無方擬之則貞而不諒大矣  
哉至樂希夷侯其禕而聽之以思固不資於子野作必在  
德亦無俟於后夔方今敦和統同反本復始別六律以分  
聽納八風而齊軌洪鐘虛受我則開其直言朱絃遺音我  
則戒夫專美此吾君之以樂理心也宜乎貴爲天子

鑒止水賦

以澄虛納照遇  
象分形爲韻

水止矣靜之其徐物鑒矣久而益虛旣無情於美惡又奚

議夫親疎委質由來所期乎上善同利忘筌已悟寧患乎  
至清無魚若乃迴塘月皎高岸環合泥滓湛而自沈金沙  
炯其不雜同道德以虛而受異川澤唯汙是納有斐君子  
此焉明徵氣隨浪息心與源澄端形赴影如木從繩其表  
微也掛金鏡而當畫其索隱也隔玉壺而見冰爾其色必  
洞澈光無滉漾不蒸蔚鬱之氣不激潺湲之響百丈在目  
千仞指掌惡每自乎中見美實非乎外獎鑒形之始方似  
以身觀身得意之間乃同求象忘象觀其下倒星漢上披  
煙雲守其常而性將道合居其止而物以羣分君鑒之以

平心臨下必簡臣鑒之以勵節在邦必聞妍蚩無形今惟人所召物我兼進兮水無不照廉士以之洗心至人以之觀妙豈比夫流若激矢波如建飢不舍晝夜爭輸滄溟徒乖躁靜之理莫辨真僞之形者哉邦家以道爲止水鑒有餘裕羣形鱗集萬景雲附濫巾竊吹者十手所指研精撫實者千載一遇夫如是姑自攝其威儀亦何憂而何懼

樂出虛賦

以聲從響際出自虛中爲韻

和而出者樂之情虛而應者物之聲或洞爾以形受乃泠然而韻生去默歸喧始兆成文之象從無入有方爲飾喜

之名其始也因妙有而來向無間而至披洪纖清濁之響  
滿絲竹陶匏之器根乎寂寂故難辨於將萌率爾熙熙亦  
不知其所自故聖人取象於物觀民以風闢嗜欲之由塞  
決形神之未通欲使和氣潛作元關暗空與吹萬而皆唱  
起生三而盡同自我及人託物於未分之表蟠天極地開  
機於方寸之中於是澹以無倪留而不滯有非象之象生  
無際之際是故實其想而道升窒其空而聲蔽洞乎內而  
笙竽作剗其中而琴瑟制波騰悅豫風行於有道之年派  
別商宮雷動於無爲之世杳杳徐徐周流六虛信闡爾於

始寂乃譁然而戒初鏗鏘於百姓之心於斯已矣鼓舞於  
一人之德知彼何如是則垂其仁有其實樂因之祖述究  
其形實其質聲因之洞出理在無二情歸得一塞雲谷而  
響絕疏天籟而音逸未隨於物絀緼乎七政八風忽變其  
和剖判於五聲六律由是遷爲草木散作笙鏞羣分自此  
而焱起九奏因之而景從道薄風漓莫究簫韶之本聲消  
韻息空傳干戚之容今則素展垂休清懸繼響平心已立  
於皇極率舞猶虛於睿想如是則薰然洩洩將生於象罔

齊人歸女樂賦

以題爲韻

昔齊人饋魯傾城者十八人瑰艷絕代綺羅嬌春洞橫波  
於慢臉迴流風於嫋身蓋以仲尼定魯禮樂制齊君臣斬  
倡優於夾谷之會復土田於汶水之濱故遏雲與迴雪實  
內圖而外親將敗魯之政弱齊之鄰魯君臣果不端操迷  
不先覺聞進淫哇之聲皆忘聖人之學城南於是考雷鼓  
黻雲幄結齊魯之歡受鄭衛之樂感煩音之滯滯成正聲  
之踏駮夫子則不可救其失復其迷望龜山以命操觀鳳  
凰而銜悽痛王綱之蕩蕩順天命之栖栖魯侯若盛德是  
樹古道是稽抑麗靡而不納見聖性以思齊知季孫之僭

惟仲尼是與足以受無疆之休足以振將墜之緒行敵國之敢抗良霸功之可侔悲夫任權臣之傾國納文馬與美女薦神祇之所歆誘耳目而不拒荒笑語之啞啞溺衣裳之楚楚由是齊日以長魯日以微見鄰國之侵地聞志士之沾衣雖代祀則遠而德音不違往者不可諫來者猶可追若鑒魯道之有蕩放鄭衛而不歸則可以得域中之大  
致天下之肥者矣

由鹿賦

并序

貞元丁卯歲予南出襄樊之間遇野人繫鹿而至者問之



金匱要略卷之五  
答曰此爲由鹿由此鹿以誘致羣鹿也備言其狀且曰此  
鹿每有所致輒鳴嗥不飲食者累日予喟然嘆曰虞之卽  
鹿也必以其類致之人之卽人也亦必以其友致之實繁  
有徒古之然矣嗟乎鹿無情而猶知痛傷人之與謀宴安  
殘酷者彼何人斯彼何人斯物微感深遂作賦曰

鹿之生兮亦秉亭毒備齒角以無競循性情而自牧姑有  
昧於行止尚焉知乎倚伏捨爾崇林輕遊近麓偶巧網之  
生致蒙主人之全育飲以渫井飼於芳庭寢卧荃柔騰倚  
蘭馨露往霜來日安月寧雖矯性而非樂終感恩而不驚

曾不知養非翫物用有深意命曰由鹿俾陷其類涼秋八月爽景清氣羈致山阿縻於蹊遂設伏以待翳叢而伺同氣相求誘之孔易將必慕侶豈云貪餌呦呦和鳴麋麋狎至彼泯慮於猜信此無情於誠僞孰是倉猝禍生所忽毒鏑歛以星貫潛機劃其電發或洞胷而達腋或折足而碎骨望林巒兮非遠顧町疇兮未滅風嗥澤而北迅自掩山而西沒走駭侶於巖煙叫饑羸於澗月苟行路之聞者孰不心摧而思絕相爾由矣野心而仁望純束兮驚惋顧獲車兮逡巡視鼎中之消爛觀机之上之剖分忽哀鳴以感類

若沈痛之在身雖復處之密邇享以豐珍比檻猿之駭躍  
同海鳥之愁辛敢擇音而後死思走險其何因痛無知以  
相陷含惋毒而莫伸客有感而言曰物誠有諸人亦宜乎  
撫事或比原心則殊借如淮陰構禍冤在神理通說且拒  
豨謀寧起堂堂蕭公實曰知己給致鍾室胡寧忍此呂祿  
之難誰非漢臣交則不義賣亦不仁彼美酈生旣爲交親  
誘襲軍印豈無他人於戲微獸傷類如不自容忍人賣友  
而享其功滅交道兮墜義風曾麋鹿之不若何仁信之可  
宗已焉哉諒此世之茫茫吾未見其始終

管窺豹賦

以管中窺豹時  
見一斑爲韻

管實圓通豹稱奇質將竊窺以無視果遇文而得一言如  
立信初云必有可觀美在其中終荷守而勿失奚執虛而  
莫見諒衡空而有窺注目每思夫破竹專心常切於主皮  
故得精神靡怠盼睞無虧辨或未分豈敢因小人所視言  
如有準安得謂童子何知事不可輕智難相短瞻夫隱霧  
之獸乃用窺天之管豈文質之不伸獨孤明之所滿分形  
既內識規規視遠惟中央坦坦然後知虚心可達小智攸  
同毫釐必遠長短皆通投迹儻遇於東周孰辨犬羊之羣

有文而比夫西伯豈殊縲紲之中是謂祈進奚爲求知不  
倦將希國士之察用當君子之變羅因一日期所視之無  
偏利絕一源專向明之獨見乃知蔚文者道不足攀俯視  
者智或防閑何微明之有辨果偶中之無難謂容止可觀  
且殊室隙同邂逅相遇更喜通班信專美之獨嘉諒生知  
而何教流睇已假夫觀止審像乃知其是效十年之學自  
分西晉之賢一管之明更識南山之豹夫如是則履中不  
昧應手無疑冀覲覲之有以得專精而所之亦何必誇久  
視騁一時然後知求仁之可驗惟智者之念茲

皇帝親庶政頌

并序

臣聞光宅大寶茂育羣生神而明之必在上聖然則所同者道所異者時或以垂拱仰成或以勵精自致及乎俗躋仁壽理洽時邕弛張之政不殊勞逸之功則倍我皇帝體至化含元精苞乾剛履坤順誕膺駿命恢纂鴻休宣八聖之重光集百靈之奧祉如天之燾如地之容鼓義爲雷霆奮仁爲風雨幹璇衡而轉七曜懸金鏡而納九圍廓氛沴而川澄沓禎祥而山委昔軒轅氏斬蚩尤滅火帝功至大矣若非仗風后之助受元女之符未能尅也陶唐氏誅四

罪定水災德至厚矣若非大舜之登庸伯禹之盡力未能成也湯以伊尹爲相始定殷功武以太公爲師乃康周道高宗紹復資傳說啟沃之言宣王中興賴山甫將明之政今陛下太康四海雄軼二紀百姓不知其日用羣臣無望於清光而乃業邁乎前王功高乎古烈聖作物睹孰知其源竊以管窺天倪蠡挹溟量庶乎大略可得而言焉陛下自代天統物之初則以屈已濟人爲意處臨庶政窮總萬樞四冊賢良六親郊祀勤恤於理本盡瘁於生靈詳曠代之所未詳慮列辟之所未慮夏景暎而方食寒星在而求

衣寸陰不捨於論思子夜猶觀乎啟事除一物之患而品  
類以安伸匹夫之冤而庶獄自直棄瑕而錄用含垢而宥  
過小善可紀必拔於宸衷片言有孚不忘於睿聽至如天  
時之豐約地利之險夷邦賦之盈虛師律之貞暴閭閻之  
疾苦稼穡之艱難人風之情僞吏理之得失莫不密歸神  
算潛納皇明雖陰陽不能以氣欺雖神鬼不能以形遁何  
細而不及何大而不苞何祕而不彰何難而不就猶復登  
臺念在險之慘聞樂思向隅之情御裘感襁褐之寒臨膳  
憂簞食之餒日慎一日旣泰而不自泰旣安而不自安兢



兢乎業業乎此其所以廣運而有成全功之克舉者也然而感覆燾之恩者欲天之彌高荷容載之德者欲地之彌厚仰照臨之明者欲日月之彌光微臣被淳風飲元澤親挹行事親睹昇平憂勞誠難願陛下勉之而已美善誠盡願陛下保之而已若夫雖休勿休元默優柔君上之體也適觀厥成蹈舞頌聲臣下之職也爲而不有德莫至焉知而不稱罪莫大焉臣某敢昧死再拜稽首獻皇帝親庶政頌一首其詞曰

士師邁德元元儲慶幽而復曜高祖受命貞觀致理開元

殷盛艱而復康皇帝親政受命維何邈萬斯年親政維何  
夕惕朝乾天道福謙我則奉天生人在勤我則率先憂堯  
之心勞禹之形求人之瘼思國之經年亦豐止御膳不馨  
夜如何其皇寢未寧修文偃武太和氤氲海不揚波天無  
纖氛鳥章之長椎吉之君會朝明庭其從如雲巍巍崇崇  
於穆昭融宜播大樂以宣皇風鏗鏘盛德蹈厲神功下臣  
作頌永示無窮

代孔侍郎蕃中賀順宗登極表

臣某言六月十六日入蕃告哀使左金吾將軍兼御史中

丞田景度至吐蕃別館伏承皇帝陛下以正月二十六日  
明德奉天纂臨宸極重光昇耀百化惟新澤被幽遐慶覃  
動植中賀臣聞和氣旣蒸勾萌畢達時雨將降柱礎猶知  
臣從役單車閉留絕域天臨日照而別處幽陰雷動風行  
而元爲聳贖伏願陛下義敦柔遠禮及窮荒始獲虔奉德  
音仰霑聖澤具寮就列無階蹈詠之初庶物效靈獨在飛  
沈之後舛薄鍾命恥玷自躬疚心厚顏罔知攸措今月七  
日自別館回至河州大夏川卽以十二日進發星言夕惕  
莫敢遑寧瞻望闕庭載深感躍無任喜忭屏營之至

代百官請上尊號第三表

臣某等言臣等自管窺天以凡揆聖度奉徽號罄陳至誠而再降謙光未迴宸睠慙跼罔據彷徨失圖臣等誠感誠懼頓首頓首臣聞強名曰道莫體混元之功推大於天豈報生成之德徒以定物視聽示人津涯俾其會歸有所則象伏惟皇帝陛下克廣睿圖紹休聖緒順考古訓茂宣重光亭毒以佐天和震曜以除人害性與道合身爲化先神行六幽威動九服求珠赤水觀妙用於無方檢玉名山告成功而有日豈可過損盛德不昭鴻休棄臣子瀝血之誠

阻華夷傾首之望當仁必受乃曰至公與物無私寧嫌在  
已安卑者地山嶽之峻豈慚好謙者天日月之光何讓道  
貴傳繼禮從宜稱邦家之舊典不可以廢天人之合應不  
可以違臣等謬服官常親承至化一披肝膽三黷宸嚴殞  
越爲期俯伏俟命實望陛下隨時立教以欲從人游神於  
不宰之鄉屈已於有名之域潤色大寶發揮皇猷古今一  
時天下幸甚無任懇迫屏營之至謹奉表陳請以聞

賀冊皇太子表

臣某言伏見十月十二日敕伏承皇太子以四月二十一

日冊命禮畢光紹前典惟懷永圖神人允諧動植咸賴臣  
某誠歡誠忭頓首頓首臣聞燕翼貽謀帝王之大孝立嫡  
主器禮易之明訓伏惟皇帝陛下克明峻德恢纂鴻休武  
功有成文理既定然後宏三王之教諭建萬國之元良凡  
在生靈孰不慶幸臣守官荒服稱賀無階竊忭嶺隅倍萬  
恒品無任感悅屏營之至謹奉表陳賀以聞

代杜司徒賀大赦表

臣某言伏奉今月二日制書改元元和大赦天下新雲雷  
之澤重日月之光仁被幽遐慶覃動植三元經始萬化惟

新臣某誠歡誠忭頓首頓首臣聞羲軒馭宇堯舜爲君德  
莫盛於好生政莫宏於在宥然而事資體要理極精微百  
王所難千載斯遇伏惟皇帝陛下纂臨大寶光啟睿圖當  
獻歲之元順陽和之氣朝前殿御正門發德音布慈旨明  
大孝之本裒至忠之後省役輕稅以清疾苦之源蕩累滌  
瑕以厚廉恥之俗往典之所未舉前代之所未該莫不悉  
出宸衷咸歸聖政坐開仁壽之域行見雍熙之朝凡在生  
靈孰不慶幸况臣陳力滋久受恩最深而蒲柳餘年犬馬  
多疾不獲奉觴丹陛蹈詠康衢猶蒙天眷留聖慈曲至特

降中使俯加慰勉衰憊增氣枯朽生光施重邱山感深骨髓闔門灰粉豈足上報無任喜忭屏營之至

代李侍郎賀收成都表

臣某言伏見高崇文奏以九月二十二日官軍入成都府逆賊劉闢走出見勒兵追捕者臣聞夏震秋落乃觀成物之功善陣有征方見勝殘之理然則殺之所以生之也動之所以綏之也氣和則歲功早就德盛則廟算先期無遺鏃而巨盜窮奔不血刃而全蜀底定奔走夷裔鼓舞生靈騰瑞氣而躍祥風披慶雲而捧白日伏以陛下纂臨宸極



惟新庶政拓跡開統之始作法定制之初而賊闢敢犯天威首干大紀恃嶮與遠窮兇極暴雖禍淫助順誠天道之必然而制勝舉全皆聖謨之自出一昨諸軍既集鋒鏑爭先陛下以爲方暑用兵觸冒害氣與勦人而欲速寧全衆以功遲遂令緩螻蟻之誅抑貔貅之銳休養磨礪以須秋期由是感恩而思奮者萬心如一又高崇文疾惡太甚殺傷小過陛下推弔伐之義宏覆燾之慈狂寇是誅吾人何罪遂令逐北者生致爲上脅從者獲則捨之且諭鴻私仍加宴慰由是飲澤而向化者十室而九加以聖慈曲被大

信有孚當挾纊之時賜戰士悉出內府開食黠之路賞降  
者曾不踰辰遂使昏迷革心義勇增氣江山自拔雷雨長  
驅渠魁假息而逃威士衆順風而捨仗市不易肆巷無驚  
犬人蒙骨肉戶解倒懸旌旗導長養之風金鼓動發生之  
氣然後知至仁能殺睿略無方大典用彰神武可畏全苞  
形氣之內有罪必誅旁行天地之間無思不服臣謬膺重  
寄親奉昌期坐觀氛祲之清目視鯨鯢之戮手舞足蹈倍  
萬恒情無任慶忭之至

代李尚書賀生擒李錡表

臣某言臣得某官某乙狀報伏承今月十二日夜浙西將士張子良等相率效順生擒李錡者天討有罪國無稽誅夷夏同歡飛沈咸躍臣某中賀臣聞炎氣方蒸伏陰不能藏其沴必疑戰發泄以彰正陽之功至化方融大姦無所隱其慝必陵犯誅夷以耀聖人之武沴不盡消生德不遂姦不盡發聖功不成蓋自然之明徵而必至之恒理伏惟皇帝陛下光膺峻命恢纂鴻休仁育羣生義征不諛無與讓而誕修文德不得已而有此武功日者周歲之間大刑再舉朔陞叛將獻首於九廟之庭益部兇渠伏鑕於萬人

之目被髮左衽且猶知懼肖形含氣孰不革心賊鋒身齒  
人倫家承國籍三朝任遇五族光輝而獨藏禍謀密聚姦  
黨梟琳之牙旗尚在忽已發狂戮闢之刃血未乾敢茲拒  
命陛下重難戎事深愍遠人先示招諭後加討伐方伯嚴  
兵有司調食經略纔下形勢已張果得義勇叶心鬼神假  
手大旆迴指長戟合圍兵火之氣天運金鼓之聲海動曾  
不終夜遂擒元兇巷有居人市無改肆滔天之逆踰月而  
平去歲西征則善陣不戰今茲東伐則善師不陣有以見  
睿略天縱神武日新聖道久而投刃皆虛德澤深而用力

彌寡從此氛窮沴盡俗變風移百蠻成冠帶之鄉五兵爲  
耒耜之器溥天同軌比屋可封古今一時堯舜何遠臣謬  
膺重寄時荷殊恩載逢河海之清三睹鯨鯢之戮志深除  
惡義切同休歡忭之誠倍萬恒品無任手舞足蹈屏營之  
至謹奉表陳賀以聞

欽定全唐文卷六百二十六目錄

新文藝出版社藏書

呂溫二

代武相公謝賜槍旗器甲鞍馬表

代李侍郎賀德政表

代賀瑞雪表

代齊賈二相賀遷獻懿二祖表

代杜司徒讓平章事表

代百寮賀放浙西租賦表

代武相公謝借飛龍馬表

道州刺史謝上表

衡州刺史謝上表

代鄭南海謝上表

謝授右拾遺表

代李侍郎謝用內庫錢充軍資表

代伊僕射謝男宥授安州刺史表

代百寮謝許遊宴表

代文武百寮謝宣示元和觀象歷表

謝章服表

代張侍郎起居表

代國子陸博士進集注春秋表

爲成魏州賀瑞雪慶雲日抱戴表

代李侍郎論兵表

代百寮進農書表



欽定全唐文卷六百二十六

呂溫二

代武相公謝賜槍旗器甲鞍馬表

臣元衡言今日中使某乙至臣宅奉宣聖旨賜臣槍旗器甲鞍馬并錦彩等禮殊其數物備其容肅以將威煥以昭寵雲澤濡體天光照門抃駭失圖兢惶罔據臣某誠荷誠感頓首頓首臣才無可取進不因人陛下憐其小心知其盡節特紆宸睠謬委台司匡輔之益無聞將明之效靡著方俟嚴譴忽被殊恩寄重西南任兼中外封開大郡秩正

黃樞登壇於六符之階被袞爲三軍之帥古今盛典盡在  
茲日人臣寵貴併集微躬豈臣孱庸所克負荷非臣隕越  
所能上報重錦名馬元甲朱旂王事靡盬儼有行色天顏  
咫尺忽當遠離感戀徬徨拜受涕咽折衝分閫愧非式遏  
之才榮耀自天猥辱專征之賜無任感恩激切之至謹奉  
表陳謝以聞

代李侍郎賀德政表

臣某言臣聞上蒼垂象當分野者先知元后用心奉職司  
者方見是以堯稱光被四岳得於疇咨舜號文明九官稟

其分命豈非隨方表志因事立言陳力自參於化源造膝  
難迷於日用伏惟皇帝陛下睿圖濬發元德廣運恢纂鴻  
緒允升大猷振十聖之遺休復百王之墜典至如崇陵盡  
瘁率禮無違長信歸尊因心則感內成則仁敘九族外平  
則義協萬邦厚俗則寵及高年廣孝則榮加錫類能刑則  
朝無隱慝善任則野不遺才修文則戎蠻來威整武則南  
北繼捷此皆事懸日月聲洽寰區黔首之所謳歌搢紳之  
所朴蹈其或機參造物意兆先天事隔於人謠功隱於朝  
聽者若非奉職之臣官業所及諒無得而稱焉臣以庸劣

謬膺寄任調盈虛而馭輕重關成敗而繫安危職思其憂  
夕惕若厲每因罄率披竭愚衷出奉溫顏累承睿旨有以  
知造化之意有以見天地之心曠若發蒙析如愈疾管窺  
所至可得而言昨者臣以潮州刺史李璿放縱私鹽耗散  
公利請從免職以儆慢官陛下以爲法令改更且當申諭  
道塗悠遠容或未知俾爲後圖用緩前責宏恕包於廣大  
明察貫於精微此則羣臣不可望清光者一也江南西道  
觀察使楊憑奏以支郡旱歉經賦不充請征居地之羨且  
循稅茶之法陛下以爲天災流行有時而息人怨滯結貽

患則深縱無日新之美忍復已除之弊特令寢奏姑務通  
商有司知畫一之方負販有昭蘇之望此又羣臣不可望  
清光者二也臣嘗使推官殿中侍御史崔太素奉使淮南  
臣以太素名秩甚卑濬決務重徵令郡縣釐訓役徒須示  
等威請賜章服陛下以爲職任伊始勤效未成必有可觀  
乃申後命臣再陳所切方可其奏雖事從權與且符濟物  
之宜而賞不僭行已見永圖之旨此又羣臣不可望清光  
者三也臣對敷之日親奉德音知臣使司支計闕少必擬  
昭明儉德振起素風率身爲天下之先節用自中宮而始

又曰臺殿舊制已當惕慮經營改作非所措懷將不崇三尺之階豈復議十家之產發自宸念形於天顏意開而河海自清言出而神祇知感此又羣臣不可望清光者四也陛下光臨大寶星歲將周貴戚之賜與無聞恩倖之霑霈殆絕至於贍軍供國行賞報功則必鴻毛府庫糞土金玉遂使夏州諸將恨效淺而恩深劍外三軍知生輕而義重此又羣臣不可望清光者五也夫唐虞盛烈文武餘風莫不傳誦聲詩布在方冊且匹夫匹婦片善必書飛羽沈鱗一祥皆紀况陛下動關教化言在政刑理參至道之精躬

行盛德之事而沖虛謙讓鬱而未發將何以先揚藝祖昭  
示後昆伏請宣付史館永爲大法臣幸蒙恩遇獲奉昌期  
言必親聞事皆目睹分深骨髓義激血誠輕齎宸嚴魂宇  
飛越無任屏營之至

代賀瑞雪表

臣某言臣聞周陳洪範王者之首政惟農魯作春秋國家  
之大事在祀農憂旱之爲虐祀戒雨之失時亦由聖感節  
宣孰云冥數前定臣伏見比者冬陽愆候宿麥未滋陛下  
減膳撤懸晨興夕惕加以郊禋日近輦路飛塵竊慮增軫

聖情微昏羽衛帝誠神應人欲天從果得風雨叶期陰明  
若契每至乘輿就次御幄寧居然後助澄掃於前驅效霑  
潤於清道及夫廟廷金奏則橫漢昭回壇墀烟升則纖蘿  
不動從容成禮鼓吹還宮御正陽之門施作解之令歡呼  
夷夏踴躍生靈三代之備物克終百王之能事斯畢神休  
坐降瑞氣潛蒸玉鸞僅輟其行音素雪已飛於前殿盈天  
表慶成花效奇洽萬國之歡心啟千載之昌運若非孝踰  
舜德勤過堯心則何以禮一接而幽報隨彰景未移而明  
徵遽至上辛受福獻歲告豐天地迴動於精誠陰陽變化



於宸念始悟竹宮望拜徒神無用之光交門作歌乃爲語  
怪之事臣謬膺重任獲侍嚴祠嘉候殊祥愜心在目受恩  
既深於庶類同休豈止於恆情手之足之罔知攸措無任  
感躍屏營之至

代齊賈二相賀遷獻懿二祖表

臣某言伏見今月十四日制命以尊尊親親之義虔祔獻  
祖懿祖於德明興聖廟室正太祖景皇帝東向之尊者十  
五日奉遷事畢十六日祫饗禮成日月貞曜乾坤定紀稱  
情靡忒合敬有歸百神得受職之方萬國知來敬之本中

賀臣聞國有事莫大於嚴祀禮有經莫大於尊祖夏殷得之以繁祉周漢用之以休明爰自魏晉迄於隋氏或以祚短而不及祧正或以時艱而未遑討論紛綸興謝絲曠載祀竟虛盛典允屬昌期陛下道冠前王慶殷累聖奉無競之烈克廣鴻休瞻有赫之靈思正大典精誠感念盱食疇咨內斷皇明俯裁羣議奉祖宗於常尊之地定昭穆於式序之宜清廟肅雍元穹保佑奔走夷裔鼓舞生靈煥乎觀一代之光盛矣接千年之統臣等自鍾舛薄坐嬰衰瘵不獲躬執遵豆稱慶闕庭誠仰聖敬感深孝理形留神往倍

百恆情無任竊忻之至

代杜司徒讓平章事表

臣某言伏奉恩制授臣檢校司徒充度支使兼鹽鐵轉運等使依前同中書門下平章事恩獎殊常授任非據承旨慶忭省躬慚惶中謝臣素無異能幸逢昌運頃因人舉累荷國恩聲績靡聞塵忝增懼陛下丕承景命光闡鴻猷理財阜人尤所注意臣竊位時久妨賢愧深柄用之地甘心自絕豈謂大明私照元造曲成俾參論道兼領經費當至化鼎新之日在微臣遲暮之年將何以上副宸衷外弭官

謗負乘爲盜冰炭在懷庶遵周任之言敢飾范宣之讓伏  
惟睿鑒俯亮愚誠特降殊私賜寢嚴命則聖朝無虛授之  
議微臣遂審已之宜遐邇之間孰不知勸無任懇迫屏營  
之至

代百寮賀放浙西租賦表

臣某等言伏見今月十五日制命以天下經賦首於東南  
浙右諸州薦罹災歉全以逋債大敷湛恩人謠勃興朝聽  
震動中賀臣聞三王已降縣曠千祀爲邦之政盡在欲理  
之主甚眾莫不知傳戒獨豐語稱與足至於愛人節用之

際約躬紆國之時則必情隨事遷以欲忘道故曰人鮮克  
舉行之惟艱伏惟皇帝陛下濬發睿圖紹休聖緒躬行慈  
儉子育困窮皇明燭幽惠訓不倦撫臨萬國曾未再周深  
求疾苦之源屢下蠲除之詔裁戎祀之經費減乘輿之服  
御雖邦計之有羨入憂於未憂雖生人之所樂輸損之又  
損風行號令日貫精誠明神聽其德音和氣生於文字將  
舟車所及咸升至理之期豈江湖下方獨被曲成之澤臣  
等尸素有日獻納無聞尚勞聖心軫恤人隱甘同凡品不  
敢望於清光竊與疲甿共謝生於元造無任感忭之至

代武相公謝借飛龍馬表

臣元衡言伏蒙聖慈借飛龍馬若干匹至京兆府界首者  
臣謬處台司將明薄效自忝方任恩禮特加獎諭綢繆寵  
錫輝煥寒衣病藥悉出聖慈匹馬一人咸經御選遠覽圖  
史近徵耳目如臣蒙幸未見其倫實有何功敢當斯遇盡  
節竭誠在臣子之本分殺身致命報君親之常道竟將何  
力上答殊私空保丹誠以致灰粉王程靡處天駟言旋仰  
服阜之有期恨違顏之方始精魂自越顧步莫留權奇之  
姿向雲闕以驤首悃款之戀與星影而共馳瞻望天庭罔

知所措無任感戴彷徨之至謹奉表陳謝以聞

道州刺史謝上表

臣某言臣去年十月十七日蒙恩授使持節道州諸軍事  
守道州刺史奉命星馳不敢遑息以今月七日到州上訖  
祇寵自天戰踖無地臣某誠兢誠感頓首頓首臣謬以孱  
庸早參朝序再塵憲府三踐文昌竟不能著稱彌綸贊肅  
綱紀合行殿黜翻蒙獎任共至公之理分子物之憂自古  
審官莫斯爲重臣才乏吏用識昧政經將何以克副聖心  
撫寧遐俗唯當勤宣皇化虔奉彝章苦節勵精少酬萬一

臣無任受恩感激之至謹奉表陳謝以聞

衡州刺史謝上表

臣某言伏奉五月一日恩制授臣使持節衡州諸軍事守衡州刺史散官勳賜如故謹以七月十五日到本州上訖恭承寵命循顧庸虛感忭失圖戰跼無地臣某誠感誠懼頓首頓首臣聞三載陟明虞書盛典六條舉最漢制宏規必在上允帝俞俯諧師錫臣謬領郡務素無吏能虔守國章布宣皇化匪寧夙夜再換炎涼仰奉陛下憂勤以恤遠人凋瘵雖檢身蕭下不敢愧於神明而阜俗移風竟未彰



於績用將何以特膺睿獎簡在宸心當愷悌之旁求副循  
度之慎選省躬增愧殞首知慚謹當恪勵精誠策磨朽鈍  
冀立日新之效少酬天覆之恩實望聖慈照臣肝膽臣無  
任感躍屏營之至謹差某官某乙奉表陳謝以聞

代鄭南海謝上表

臣某言臣自遠離闕庭晨夜奔涉祇承寵命不敢遑寧謹  
以某月某日到所部上訖仰宣聖旨親諭遠人酬恩之效  
求期戀主之誠已積臣某誠恐誠懼頓首頓首臣本章句  
諸生器用無取徒以小心畏敬謬爲先聖所知趨奏禁闡

浸踰星紀屬內外危疑之際是非剖判之初實以艱貞自持中立無倚天高聽近愚款獲申神幽鑒明昌運斯屬遂蒙陛下擢於侍從超冠等倫用其憂國之寸心委以代天之重務俯僂三命炎涼五周登車奉馭朽之懷假寐感宵衣之志徒耗神用莫能將明篋盈謗而方賜駉駉鼎折足而未忘簪履竟以陳乞遂其優容無綺季夏黃之德而猥當調護無竇融賈復之勞而獲奉朝請以此沒齒猶爲負恩豈意曾未踰年忽蒙抽獎廟授鈇鉞廷賜旌旗俾臣懦夫當此大任節制五嶺幅員萬里伏波之銅柱猶在永謝

奇功士燮之鼓吹日聞彌慚武幹將何以宣美皇化拔揚  
國威洗愆責於千齡答生成於再造唯當舉章修法苦節  
清心撫獷俗以思柔酌貪泉而無懼庶幾萬一仰副憂勤  
但以白日在天長安不見丹涯限地溟海方深顧蒲柳之  
前衰奉軒墀而尚遠無任感戀屏營之至謹差某官某奉  
表陳謝以聞

謝授右拾遺表

臣某言伏奉制命擢臣右拾遺又中使毛進朝至宅奉宣  
進旨賜臣本官官告者澤濡窮鱗雷起幽蟄塵忝近侍冠

軼常倫震驚失圖兢跼罔據臣某中謝臣嘗學舊史承訓  
先臣皆以奉上自致爲榮附下苟進爲恥臣所以旣孤之  
後義不因依賣洛中之薄田歸闕下之舊宅退藏其跡私  
誓於心不邀利於權門不求名於衆口星霜苦節夙夜精  
誠唯願投軀盛時自結明主愚誠神感人欲天從果蒙陛  
下自記姓名猥憐孤直振零丁於絕望拔曖昧於無階獨  
斷皇明超至清列俯降中貴內賜官告特違恆例光寵賤  
臣俾其不出戶庭坐生羽翼萬乘知已一鳴驚人公朝得  
盡節之方私室無謝恩之處顧惟凡陋叨此殊尤纏激血

誠銘鏤膚骨采拔恩重泥塗感深畢性命以爲期裂肝膽  
而何述唯當竭誠陳力效節明忠使丹心有孚白首無玷  
然後敢望披雲捧日一識天顏則闔門之灰粉知歸百生  
之志願斯畢臣家雖在城多適田野久廢簪笏皆須營備  
不獲當時隨例拜謝闕庭

代李侍郎謝用內庫錢充軍資表

臣某言今月十三日面奉進旨其南郊賞設錢恐度支支  
計闕少以庫內錢充者臣聞王者以四海爲家君道唯百  
姓與足象天平施而無別如地生財而不私薄奉已而厚

奉公重從人而輕從欲知則孔易行之惟艱曠代莫聞今  
日斯遇伏惟皇帝陛下誕膺駿命富有萬邦而能保元光  
慈儉之宗奉列聖憂勤之緒臣謬司禹貢竊見堯心非戎  
祀之用無急宣非軌物之經無別獻土木之工遂聞於廢  
息恩幸之賜殆絕於霑濡固已行路謳吟搢紳抃歎者久  
矣伏以郊禋有日慶澤自天楚師思挾纘之恩漢將望解  
衣之惠國存舊典事有恆規臣在職司敢不供集陛下憐  
江淮甫罹旱歉念庸蜀新罷大兵雖經費有餘而聖慮猶  
軫昨因伏奏親奉德音悉擬發內府金錢御服繒綵約躬

節用紓國贍軍允叶師和克虔祀事必知感神之德未酌  
獻而幽通動天之誠先燎烟而上達百祥所降萬福攸宜  
信可以光洽寰區夔掩圖篆家知自遂戶識至公風人寢  
杼軸之詩黔首臻富庶之域微臣何幸獲覩昇平至德難  
名載深感懼無任喜忭激切之至謹奉表陳謝以聞

代伊僕射謝男宥授安州刺史表

臣慎言伏奉某月日敕授臣男宥安州刺史兼侍御史充  
武昌軍兵馬留後仍賜紫金魚袋者雷驚里巷日照閨門  
寵命自天戰跼無地臣誠懼誠感頓首頓首臣聞惟君任

臣固無虛授知子者父敢私不才臣頃者伏以聖政惟新  
時清無事遂絕指蹤之望求申戀主之誠陛下以臣統兵  
歲深周涉艱險長三軍之子弟積百戰之瘡痍將有去留  
念其情義理資感勵事貴便安爰敕臣男試總戎務臣雖  
訓之以義教之以忠而鈍拙有涯策磨靡及童兒代斲每  
懷傷手之憂小子在邊曾無折屐之喜將何遽膺寵數荐  
沐恩光真授竹符就加金組且祁午之爲軍尉父已懸車  
陸抗之將父兵子非綵服豈比臣身居端右男領方州鳴  
玉會朝朱轡行縣焜燿中外超冠古今名數之樂何加人



臣之事斯極千載至公之運獨被殊私萬物咸遂之辰先蒙曲澤滌肝呈膽莫盡微誠毀族滅身寧足上報臣無任感恩隕越之至謹奉表陳謝以聞

代百寮謝許遊宴表

臣某等言今月二十三日宰臣奉宣進旨如聞百寮士庶等親友追遊公私宴集及晝日出城餞送每慮奏報自今以後各暢所懷者志存必信義切同休令行如春神應若響寒木暉潤嚴風變和推已感於人心發生先於天意臣某中謝臣聞與人同其樂者不必盡致於韶夏之庭在夫

不奪其歡而已與物致於誠者不必日效於丹青之信在  
夫不察其細而已況乎搢紳之樂名教聚皆以類臣子之  
事君父遊必有方豈足輕聳物情遽塵天聽伏惟皇帝陛  
下光纂十聖威臨萬方神武功就人文化成窮溟無波豐  
歲將宴樂奏穆清感深乎共樂之道駕言遊幸思所以適  
人之方爰詔輔臣式將明命優諭卿士達於庶人琴筑追  
遊無憚京輦輜輶送遠勿限嚴城禁吏司之苛察盡朝野  
之歡泰始覺飛沈之樂宇宙之寬物不自疑人知所措在  
宗載考夜飲承湛露之恩求友相鳴時宴奉祥雲之慶浹

休聲於夷夏蒸喜氣於山川千載之昌運允符百王之遺  
美斯舉臣等謬膺寄任親奉休明方感生成之德更蒙優  
貸之詔恭承睿旨務竭歡心飽思屬厭醉念溫克戒竹林  
之虛誕去金谷之浮華君雖不察於泉魚臣敢有愧於屋  
漏且歡且懼居寵彌驚稽首知慚殺身何報無任感恩兢  
惕之至

代文武百寮謝宣示元和觀象厯表

臣等言伏見今月十三日宰臣奉宣聖旨以肇建元和惟  
新寶厯極其幽蹟冠以睿文恩示具寮慶昭萬國中謝臣

聞清濁旣判象數相生一元起於帝圖三統成於人道形  
器之表推步而得恍惚之際錙銖不差有開必先聖作物  
覩伏惟皇帝陛下誕膺駿命敬授人時爰詔日官底定歷  
法啟開元氣節宣羣生役五行於文字貫七曜於珠璧仰  
觀俯察允協於神休東作西成永貞於農候感動夷夏鼓  
舞飛沈天子之大政行焉聖人之能事畢矣臣等幸備朝  
序親奉昌期竊見天心敢迷日用無任蹈詠之至

謝章服表

今月二十一日高品薛盈珍至鳳翔府奉宣進止賜臣緋

衣魚袋笏并袋紫衣一副者發揚宸念昭灼恩光瞻奉自  
天戰跼無地中謝臣孤陋無取過蒙獎錄聖慈周洽天造  
曲成恩重出疆俾諧盡飾九重清祕不忘絕域之單車萬  
乘憂勤特記微臣之命服衣分內府錫及近藩未申汗馬  
之勞遽冒濡鵠之刺在笥增感撫躬若驚隕越兢慙罔知  
攸措

代張侍郎起居表

臣某言孟秋猶熱伏惟聖躬萬福臣以去月二十一日到  
薄安山見蕃胡尚綺里徐等同令盈珍等卻迴奏事令臣

金定三月三 卷三十二  
取今月發赴衙帳者伏惟聖德柔遠皇明燭幽蕃情大歡  
酋帥知感虔奉朝旨賓禮使臣迎勞肅躬饋餼豐潔益知  
嚮化彌表革心臣恭備單車不勝慶忭嚴程方始絕域未  
窮白日在天瞻仰如近青蒲之地伏奏猶賒感戀彷徨罔  
知攸措無任犬馬屏營之至謹因中使第五忠憲附表起  
居以聞

代國子陸博士進集注春秋表

臣某言臣聞惟睿作聖觀乎人文達則化成窮則垂訓先  
師所以祖述堯舜志在春秋懸衡百王撥亂三季正大當

之本清至公之源通羣方以誠貞天下於一動無不順道  
德之要機斷無不齊帝王之利器而梁木旣壞生知蓋寡  
三傳得失索隱未周羣儒異同致遠皆泥沒微言於滋蔓  
亡要旨於多岐奧室不開漫逾千祀天其或者將有俟焉  
伏惟陛下德合乾坤明並日月氣和物茂遠至邇安欲以  
人情爲田講學而耨鎮定皇極耀光時雍道之將行實在  
今日臣不揣蒙陋斐然有志思窺聖奧仰奉文明以故潤  
州丹陽縣主簿臣啖助爲嚴師以故洋州刺史臣趙匡爲  
益友考左氏之疏密辦公穀之善否務去異端用明本意

助或未盡敢讓當仁匡有可行亦刈其楚輒集注春秋經  
文勒成十卷上下千載研覃三紀元首雖白濁河已清微  
臣何幸與道偕遇竊以德之匪鄰骨肉無應道苟訢合古  
今相知然則堯舜之心非宣尼不見宣尼之志非陛下不  
行庶因儀鳳之辰永洗獲麟之恨臣官忝國學思非出位  
以爲家寶罪實欺天謹昧死寫前件書詣東上閣門奉進  
伏候聖旨輕黷宸嚴魂爽飛越無任

爲成魏州賀瑞雪慶雲日抱戴表

臣某言臣聞元德上升三靈爲之動色聖功下濟萬類所



以傾誠臣州去秋之間時雨不足自陽風應律子月經年  
今月十二日晚降雪越至十四旦開霽絮飛千里花翻六  
出糝初梅而委苞封宿麥而垂津其日晡時西南有慶雲  
見爲樓爲閣圖閭闔之九重非錦非繡狀衣裳之五色其  
時又有日抱戴日晚澄廓天景淑清拖黃氣而重圍舒紅  
光而四溢臣與司馬樊元則并寮屬吏等三十餘人得所  
部貴鄉冠氏等縣申稱雪厚一尺以下并覩慶雲抱戴等  
瑞臣謹按詩云上天同雲雨雪雰雰毛萇云豐年之冬必  
有積雪若烟汜勝之書云雪者五穀之精又按史記云慶

雲一名卿雲若烟非烟若雲非雲郁郁紛紛蕭索輪囷是  
謂卿雲喜氣也瑞應圖曰景雲者太平之應也一曰慶雲  
非烟五色氤氲謂之景雲援神契云天子孝則景雲出游  
又按援神契云王者德至於天則日抱戴在上曰戴在傍  
曰抱又云黃氣抱日輔臣納忠漢書曰宣重光李奇云太  
平之代日抱重光伏惟陛下受天寶命沖用情深豐食之  
要鑒寢憂勞雪爲五穀之精麥爲六田之首由是天降瑞  
雪其意若曰太平其有年乎雲者運氣立名布恩成義陛  
下仁霈草木惠及蟲魚揚祖宗之烈光垂天地之正色由

是天降雲瑞其意如曰天子其大孝乎日者眾陽之宗人  
君之表由是天降日瑞其意若曰天下其大明乎魏州大  
明之慶基光封之舊國嘉祥備致靈貺綢繆豈徒然哉斯  
有由矣臣叨陪漢守肅奉堯親逢日月之貞明嘉烟雲之  
爛熳手舞足蹈地雖限於外臺校牒披圖心已馳於雙闕  
不任感悅之至

代李侍郎論兵表

臣某言臣伏見某月日詔旨發更太原鳳翔及神策諸鎮  
兵赴劍南東川者陛下睿算無遺神武必斷與人除害順

天行誅奮如霆之威乘破竹之勢期於久逸無憚一勞大  
正國經永清時稜百王盛事千古英聲天下幸甚然或時  
事之可否兵家之利害道途之險易將帥之宜稱不可不  
深圖遠計原始要終狂夫有可擇之言愚者有一得之慮  
管窺所至願效微誠臣竊以爲古今用兵皆在將勇師和  
政齊計勝不必多兵廣衆然後成功今高崇文等諸將所  
統已約一萬五千餘人以整擊亂以順討逆授以廟算假  
之天威馘醜挫兇需有餘力若更多徵征鎮廣命師旅臣  
竊計之其患有五一則高崇文素非大將拔自偏鎮忠勇

雖著威聲未振本兵旣少兼統則多將皆權隸士非素撫  
雖是銳師勢同烏合居常則猶可脅致臨敵則何以指揮  
非惟崇文才分有限此亦自古兵家所難臣不敢廣引載  
籍上煩聖聽請直以近事明之哥舒翰潼關之守郭子儀  
相州之圍韓全義激水之役皆以兵多將雜而致敗衄許  
叔冀之保靈昌李光弼之全河陽李晟之收復京邑皆以  
兵少將一而建大功成敗昭然布在人口二則貞元以來  
天下無事四方節將人各懷安陛下覆燾惟新理先清靜  
今以西南小醜久稽天誅自春徂夏徵發已廣見在兵力

破賊有餘若更務濟師屢聞動衆山嶮深阻暑濕爲沴北  
人南役誰不憚行去土離家動生愁怨往年涇州叛卒職  
此之由事繫安危不可不察三則吐蕃約盟未定窺伺在  
心間諜往來急於郵傳又必持兩端之計與劉闢交通若  
聞發兵西南多取邊鎮秋風卽至虜馬已肥冒隙乘虛必  
有侵軼事出萬一悔何可追四則劉闢窮寇保險逃死雖  
禍淫助順天道甚明而兵凶戰危人事難必脫或貌武之  
師少不如意蜂蟻猶聚假息旬時攻守之間動須應援固  
當潛鋒養銳以逸待勞今便息兵後將何繼五則劍川磽

塋居人食且不充蜀路險艱餉運無由多致今屯兵日費  
何啻萬金數州麥粟貴糴將盡千里飛輓所濟幾何若更  
加兵實難供贍一夫脫有菜色三軍無復關心幸可少以  
成功何必多而爲患今太原及神策等軍已上道者其數  
頗多足辦戎事其鳳翔等鎮未發之兵伏乞聖恩且勒權  
停續候事宜以議行止臣謬膺重任過蒙恩遇輒率狂瞽  
輕黷宸嚴苟利國家甘心鼎鑊無任兢遑懇迫之至謹奉  
表陳奏以聞

代百寮進農書表

臣某等言臣等伏準故事每年二月一日以農務方興令百寮具則天大聖皇后所刪定兆人本業記奉進者中謝臣聞不愛珍玉祈穀於園丘可以致誠未足以爲勸躬秉耒耜籍田於千畝可以示勸未足以教人必也因天地之和順陰陽之理利其器用精厥法式變之而不倦動之而不勞四海靡而風行百姓迷其日用宏我政本實惟農書伏惟睿聖文武皇帝陛下德茂生成道光慈儉捐金而寶穀菲食而粒人考堯典以授時稽禹貢而任土潔粢盛而大事在祀銷劍戟而盡力爲農豐年屢薦於郊歌嘉瑞繼



書於國史而不自滿假惟懷永圖每至獻歲載陽仲春初  
吉俯察土膏之候仰觀晨正之祥經始歲功導揚生德徵  
有司之舊典奉先后之遺文深居穆清親覽奧妙匪崇朝  
而盡更田畝不出戶而遍洽人情見捋草抔土之艱知寒  
耕熱耘之苦宸心感念畎畝昭蘇一歎而時雨先飛三復  
而春雷自起臣等業慚學稼祿過代耕親承務本之風日  
奉在勤之訓三時不害觀玉燭於氤氲九扈孔修賀生靈  
於富庶謹繕寫前件書凡二十篇共成三卷謹詣東上閣  
門奉表陳獻以聞